



UNIVERSITÄTS-
BIBLIOTHEK
PADERBORN

Universitätsbibliothek Paderborn

S. Avrel. Avgvstini Confessionvm Libri X

Augustinus, Aurelius

Coloniae, 1646

Cap. XLIII. Verax mediator Christus est, in illo se jactasse curam suam, cum meditaretur solitudinem, & considerasse sanguinem ejus, pretium suum.

urn:nbn:de:hbz:466:1-10120

CAP. XLIII.

Verax mediator Christus est, in illo se jactasse curam suam, cum meditaretur solitudinem, & considerasse sanguinem ejus, pretium suum.

1. **V**erax autem mediator, quem secreta tua misericordia demonstraſti humilibus, & miſiſti, ut ejus exemplo etiam ipſam diſcerent humilitatem, mediator ille Dei & hominum, homo Chriſtus Ieſus, inter mortales peccatores & immortalem juſtum apparuit, mortalis cum hominibus, juſtus cum Deo. Ut quoniam ſtipendium juſtitiae, vita & pax eſt, per juſtitiam conjunctam Deo, evacuaret mortem juſtificarum impiorum, quam cum illis voluit habere communem. Hic demonſtratus eſt antiquis ſanctis, ut ita ipſi per fidem futurae paſſionis ejus, ſicut nos per fidem praeterita, ſalvi fierent. In quantum enim homo, in tantum mediator, in quantum autem Verbum, non medius quia aequalis Deo: & Deus apud Deum, ſimul cum Spiritu ſancto unus Deus.

Rom. 8,
32.

Phil. 2, 6.

Pſal. 87, 6.

Ioan. 10,
48.

2. *Quomodo nos amaſti pater bone, qui filio tuo unico non pepercisti, ſed pro nobis impiis tradidiſti eum! Quomodo nos amaſti? pro quibus ille, qui non rapinam arbitratus eſt eſſe aequalis tibi, factus eſt ſubditus uſque ad mortem, mortem autem crucis, unus ille in mortuis liber, poteſtatem habens ponendi animam ſuam, & poteſtatem habens iterum ſumendi eam; pro nobis tibi victor & victima, & ideo victor, quia*

quia victima ; pro nobis tibi sacerdos & sacrificium , & ideo sacerdos , quia sacrificium ; faciens tibi nos de servis filios , de te nascendo , nobis seruiendo. Merito mihi spes valida in illo est, quod *sanabis* ^{Pfal. 103, 3.} *omnes languores meos* per eum , qui sedet ad dexteram tuam , & te *interpellat pro nobis* , alioquin desperarem. Multi enim & magni ^{Rom. 8, 34.} sunt iidem languores mei ; multi sunt & magni , sed amplior est medicina tua. Potuimus putare Verbum tuum remotum esse à conjunctione hominis , & desperare de nobis : nisi caro fieret , & habitaret in nobis.

3. Conterritus peccatis meis & mole miseriæ meæ , agitaveram in corde , meditatufque fueram fugam in solitudinem. Sed prohibuisti mihi , & confirmaisti me, dicens: ^{2 Cor. 5, 14.} *ideo pro omnibus Christus mortuus est , ut qui vivunt , jam non sibi vivant , sed ei , qui pro ipsis mortuus est.* Ecce Domine jacto in te curam meam , ut vivam , & *considerabo mirabilia de* ^{Pfal. 118, 18.} *lege tua.* Tu scis imperitiam meam , & infirmitatem meam , doce me , & sana me. Ille tuus unicus : ^{Col. 2, 3.} *in quo sunt omnes thesauri sapientiæ absconditi , redemit me sanguine suo.* Non calumnientur mihi superbi : ^{Pfal. 11, 8.} *quoniam cogito precium meum , & manduco , & bibo , & erogo : & pauper cupio saturari ex eo , inter illos , qui edunt & sa-* ^{Pfal. 27, 27.} *turantur , & laudabunt Dominum , qui requirunt eum.*

N O T Æ.

1. *In quantum enim homo, in tantum mediator*) sic enim medius est inter Deum & hominem, similis Deo per divinitatem & justitiam, similis nobis per humanam naturam.
- Pfal. 87.8. 2. *Inter mortuos liber*) aliis enim hominibus imposita est necessitas moriendi, Christus libere illam subiit, *habens potestatem ponendi animam suam in cruce, & iterum sumendi in resurrectione.*
- Ioan. 10. 3. *Ideo Victor, quia victima*) ideo enim vicit Diabolum, quia in ara crucis cruentum sacrificium pro nobis obtulit.
4. *Ideo Sacerdos, quia sacrificium*) nullum enim aliud sacrificium obtulit, aut instituit præter seipsum; nec ad aliud à Deo patre constitutus est Sacerdos in æternum secundum ordinem Melchisedech, quam ut pro nobis offerret seipsum, & daret animam suam redemptionem pro multis.
5. *De te nascendo, nobis serviendo*) ex altero enim ut Deus, potuit afferre condignum pretium redemptionis, ex isto ut homo, potuit peragere opus redemptionis nostræ.
5. *Cogito pretium meum*) sanguinem Christi, (& *manduco, & bibo*) in Missæ sacrificio (& *erogo*) distribuens Eucharistiam communicantibus.

V S V S.

1. Etsi peccatorum magnitudo incitaret ad grandem poenitentiam & vitam solitariam S. Augustinum, vocavit tamen illum Deus ad regimen animarum, ut innumeras ex luto hæresis & scelerum extraheret, in quo ipse hæserat. Paruit ille, & maluit Christo vivere, ac minister redemptionis ejus effici, quam vivere sibi soli. Quam in re illustre exemplum dedit, etiam in vita communi & officiis Ecclesiasticis, prioris vitæ delicta, caritate Dei ac proximi posse expiari.
2. Videtur vero S. D. ad perfectionem, quam in illo veneratur orbis, triplici maxime medio pervenisse, ut hic insinuat. I. Iactando omnem curam ac fiduciam in Deo, & meritis Christi. II. Considerando mirabilia de lege divina per
fre.

frequentem meditationem. III. Crebra & haud dubie quotidiana Sacrificii Missæ celebratione, in quo pretium suum manducabat, & bibebat ipse, & aliis sæpe erogabat. Ex hoc triplici fonte manavit ingens Mortificationis studium, quo triplicem concupiscentiam edomuit, illustrique exemplo ad sui imitationem omnes confessionum suarum lectores invitavit. Vt qui imitamur peccantem, imitemur & pœnitentem, totoque corde ad Deum se convertentem.

Soli Deo Gloria.



T 4 I N-